

BE.356. NA MALUNGUN DO ROHANGKU (G=1)

=====

B.E. 356. NA MALUNGUN DO ROHANGKU

1. Na malungun do rohangku Tu Ho, o Debatangki
Ho do na hinaposanku Jala haporusanki
Sasude na ro tu Ho Nandang tarurak bahenonMu
Nasa na manoisii Ho I do na pailaonMu.

2. Pabotohon ma dalanmu Dohot bogasMi di au
Asa i ihuthononku Ale Tuhan togu au
Sian dalan na ture Dohot tu hasintonganMu
Ho do hatuaonki TolongMi do paimaonku

3. Ingot ma, ale Tuhanku Angka denggan ni basaM
Naung di au pinasahatMu Dohot asi ni rohaM
Unang ingot dosangki Na hubahen di posongku
Sai asi ma rohaMi Ala lambas ni rohaMu.

4. Nandang marolat denggan basa Ni Jahowa na bonar
Diajarhon tu pardosa Dalan angka na tigor
Na serep marroha i Ditogihon tu na sonang
Na lambok marroha i Di diboan tu na torang

5. Hasintongan, asi roha Do dalanna sasude
Di sude na burju roha Mangoloi patikNa
Tuhan, ala goarMi Sesa ma sude dosangku
Ai mansai godang do i, Lobi asa bilanganku.

6. Ise do mangkabiari Debata Jahowa i ?
Halak i do diajari Lao tu hangoluan i
Sonang do tondina i Dibagasan hasonangan
Jala pinomparna i Do tumean hasiangan.

7. Hasudungan ni Jahowa Do na bonar roha i
Hahomion ni Tuhanna Jadi do botoon ni
Sai tongtong do matangki Mangaranap Tu Tuhanku
Dipalua do pathi Sian jorgong ni musungku

8. Au na punjung jala dangol Tatap ma , o Tuhanki
Ai tu Ho do au masihol Sai palua tondingki
Tu gandana do tongtong Hagogotan ni rohangku
Sai palua ma au on Ale Tuhan Debatangku.

9. Tatap ma pardangolanku Dohot hangalutanki
Sesa ma sude dosangku Sai papir ma tondingki
Lam torop do musungki Lam jorbut do pamuraiNa
Tuhan tatap au disi Asa unang saut tahina.

10. Sai ramoti ma tondingku Tuhan , sai palua au
Ho, haposan ni rohangku Unang ma paruak au
Sai jamot ma tondingki Ala ni halidangonku
Bangso na pinillitMi Naeng tangkas paluaonMu.